



KELLY Teh menunjukkan hakisan tebing yang dibimbangi mengancam keselamatan penduduk berhampiran.

PENDUDUK melihat kesan hakisan yang semakin melebar di Tebing Sungai Keroh, Jalan Udang Pasir, Taman Megah, Kepong, Kuala Lumpur, baru-baru ini.

- UTUSAN/IRWAN MAJID

Hakisan di tebing Sungai Keroh semakin melebar

Penduduk bimbang keselamatan

Oleh **MUHAMAD AIMY AHMAD**
kota@utusan.com.my

KUALA LUMPUR 5 Dis. - Kira-kira 30 buah keluarga di Jalan Udang Pasir, Taman Megah, Kepong di sini bimbang berikutan hakisan di tebing Sungai Keroh semakin menghampiri kediaman mereka.

Dakwa penduduk, ini ditambah pula dengan keadaan cuaca yang tidak menentu, terutama ketika hujan lebat.

Seorang penduduk, **Kelly Teh**, 58, berkata, masalah yang berlarutan sejak beberapa bulan itu perlu



Kami juga risau dengan keselamatan kanak-kanak yang sering bermain di kawasan ini

TOH CHOOI SENG
Pengerusi Persatuan Penduduk Taman Megah

diselesaikan segera sebelum menjejaskan struktur rumah mereka.

Kelly yang tinggal paling hampir dengan sungai itu berkata, setiap

kali hujan lebat, paras air sungai akan cepat naik disebabkan sistem saliran yang terjejas ekoran hakisan tersebut.

“Kami sekeluarga sangat takut dengan kejadian ini, tambahan pula pada musim hujan dan tanah berdekatan sungai juga sudah lembut,” katanya ketika ditemui di sini.

Pengerusi Persatuan Penduduk Taman Megah, **Toh Chooi Seng** (**gambar**) berkata, jarak tebing sungai tersebut yang dahulu lebih 20 meter kini hanya kira-kira 15 meter daripada kediaman.

Menurutnya, pihak bertanggungjawab perlu mengambil tindakan segera sebelum kejadian tidak diingini berlaku.

“Kami juga risau dengan keselamatan kanak-kanak yang sering bermain di kawasan ini,” katanya.

Sementara itu, Ketua Pasukan Petugas MCA Kepong, **Tan Kok Eng** berkata, pihaknya telah dimaklumkan oleh Jabatan Pengairan dan Saliran (JPS) Kuala Lumpur kerja-kerja memperbaiki struktur tebing itu akan dilakukan dalam tempoh terdekat.

“Kami akan memantau keadaan ini. Diharapkan penduduk bersabar dan memberikan kerjasama sepanjang kerja-kerja baik pulih dilaksanakan nanti,” katanya.